

Аңшылық шаруашылығын жүргізу қағидаларын бекіту туралы

Қазақстан Республикасы Ауыл шаруашылығы министрінің м.а. 2015 жылғы 29 мамырдағы № 18-2/501 бұйрығы. Қазақстан Республикасының Әділет министрлігінде 2015 жылы 3 шілдеде № 11551 тіркелді.

"Жануарлар дүниесін қорғау, өсімін молайту және пайдалану туралы" Қазақстан Республикасының 2004 жылғы 9 шілдедегі Заңының 9-бабының 1-тармағының 58) тармақшасына сәйкес **БҰЙЫРАМЫН:**

1. Қоса беріліп отырған Аңшылық шаруашылығын жүргізу қағидалары бекітілсін.

2. Қазақстан Республикасы Ауыл шаруашылығы министрлігінің Орман шаруашылығы және жануарлар дүниесі комитеті заңнамада белгіленген тәртіппен:

1) осы бұйрықтың Қазақстан Республикасы Әділет министрлігінде мемлекеттік тіркелуін;

2) осы бұйрық Қазақстан Республикасы Әділет министрлігінде мемлекеттік тіркелгеннен кейін он күнтізбелік күн ішінде оның көшірмесінің мерзімді баспа басылымдарында және "Әділет" ақпараттық-құқықтық жүйесінде ресми жариялауға жіберілуін;

3) осы бұйрықтың Қазақстан Республикасы Ауыл шаруашылығы министрлігінің интернет-ресурсында орналастырылуын қамтамасыз етсін.

3. Осы бұйрық алғаш ресми жарияланған күнінен кейін он күнтізбелік күн өткен соң қолданысқа енгізіледі.

Министрдің міндетін атқарушы

С. Омаров

Қазақстан Республикасы
Ауыл шаруашылығы министрінің
міндетін атқарушының
2015 жылғы 29 мамырдағы
№ 18-2/501 бұйрығымен
бекітілген

Аңшылық шаруашылығын жүргізу қағидалары

1-тарау. Жалпы ережелер

Ескерту. 1-тараудың тақырыбы жаңа редакцияда – ҚР Премьер-Министрінің орынбасары – ҚР Ауыл шаруашылығы министрінің 02.11.2018 № 446 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

1. Осы Аңшылық шаруашылығын жүргізу осы қағидалары (бұдан әрі - Қағидалар) "Жануарлар дүниесін қорғау, өсімін молайту және пайдалану туралы" Қазақстан Республикасының 2004 жылғы 9 шілдедегі Заңының 9-бабы

1-тармағының 58) тармақшасына сәйкес әзірленді және аңшылық шаруашылығын жүргізу тәртібін айқындайды.

2. Қазақстан Республикасының азаматтары мен (немесе) Қазақстан Республикасының заңды тұлғаларының аңшылық шаруашылығын жүргізуі үшін облыстың жергілікті атқарушы органының (бұдан әрі – атқарушы орган) аңшылық алқаптарды бекітіп беру туралы шешімі, атқарушы орган мен жануарлар дүниесін пайдаланушы арасында жасалатын аңшылық шаруашылығын жүргізуге арналған шарт (бұдан әрі - шарт) негіз болып табылады.

Атқарушы органның аңшылық алқаптарды бекітіп беру туралы шешімі конкурстық комиссияның аңшылық алқаптарды бекітіп беру жөніндегі шешіміне негізделеді.

3. "Қазақстан Республикасы аумағында шаруашылықаралық аңшылық ісін ұйымдастыру қағидаларын бекіту туралы" Қазақстан Республикасы Ауыл шаруашылығы министрінің 2012 жылғы 17 ақпандағы № 25-03-01/63 бұйрығына (Нормативтік құқықтық актілерді мемлекеттік тіркеу тізілімінде № 7472 тіркелген) сәйкес аңшылық алқаптарды шаруашылықаралық аңшылық ісін ұйымдастыру нәтижелері бойынша жануарлар дүниесін қорғау, өсімін молайту және пайдалану саласындағы уәкілетті органның ведомствосы осы Қағидаларға қосымшаға сәйкес аңшылық шаруашылықтарының санаттарын айқындайды.

4. "Қазақстан Республикасының аумағында шаруашылықішілік аңшылық ісін ұйымдастыру қағидаларын бекіту туралы" Қазақстан Республикасы Ауыл шаруашылығы министрінің 2012 жылғы 16 шілдедегі № 17-03/362 бұйрығына (Нормативтік құқықтық актілерді мемлекеттік тіркеу тізілімінде № 7851 тіркелген) (бұдан әрі - Бұйрық) сәйкес аңшылық шаруашылығы ұйымы шартта белгіленген мерзімде өзіне бекітіп берілген аңшылық алқаптарда шаруашылықішілік аңшылық ісін ұйымдастыруды қамтамасыз етеді.

5. Шаруашылықішілік аңшылық ісін ұйымдастыру материалдары бойынша әзірленген аңшылық шаруашылығын жүргізу жоспарын аңшылық шаруашылығы ұйымы бекітеді, осыдан кейін орындалуға жатады.

6. Шаруашылықішілік аңшылық ісін ұйымдастыру ұзақтығы 10 (он) жыл тексеру кезеңіне немесе бұйрығына сәйкес шарттың жасалу мерзіміне әзірленеді.

Шаруашылықішілік аңшылық ісін ұйымдастыру материалдары аңшылық шаруашылығының санатын өзгерту, шартқа өзгерістер мен толықтырулар енгізуге үшін негіз болып табылады.

6-1. Аңшылық шаруашылығын жүргізуге арналған шарт:

- 1) аңшылық шаруашылығын жүргізуден өз еркімен бас тартқан;
- 2) аңшылық шаруашылығын жүргізуге арналған шарттың қолданылу мерзімі аяқталған;
- 3) аңшылық шаруашылығы субъектілерінің қызметі тоқтатылған;
- 4) аңшылық шаруашылығын жүргізуге арналған шарт талаптары жүйелі түрде бұзылған;
- 5) Қазақстан Республикасының жануарлар дүниесін қорғау, өсімін молайту және пайдалану саласындағы заңнама талаптары жүйелі түрде бұзылған;
- 6) аңшылық алқаптарын бекітіп беру жүргізілген жер учаскелері 2003 жылғы 20 маусымдағы Қазақстан Республикасының Жер кодексінде белгілі тәртіппен мемлекеттік мұқтаж үшін алып қойылған жағдайларда тоқтатылады.

Ескерту. 2-тарау 6-1-тармақпен толықтырылды – ҚР Премьер-Министрінің орынбасары – ҚР Ауыл шаруашылығы министрінің 02.11.2018 № 446 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

2-тарау. Жануарлар дүниесі объектілерінің мониторингі үшін санын есепке алуды, мәліметтерді жинауды ұйымдастыру

Ескерту. 2-тараудың тақырыбы жаңа редакцияда – ҚР Премьер-Министрінің орынбасары – ҚР Ауыл шаруашылығы министрінің 02.11.2018 № 446 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

7. Жануарлар дүниесінің объектілерін есепке алудың негізгі мақсаты осы жануарлар таралымдарының жай-күйін бағалау және оларды қорғау, өсімін молайту және орнықты пайдалану жөніндегі іс-шараларды жоспарлау болып табылады.

8. Бекітіліп берілген аңшылық алқаптардағы жануарлар дүниесі объектілерінің санын есепке алуды аңшылық шаруашылығы ұйымдары "Қазақстан Республикасының аумағында жануарлар түрлерін есепке алуды жүргізу жөніндегі нұсқаулықты бекіту туралы" Қазақстан Республикасы Ауыл шаруашылығы министрінің 2012 жылғы 1 наурыздағы № 25-03-01/82 бұйрығына (Нормативтік құқықтық актілерді мемлекеттік тіркеу тізілімінде № 7492 тіркелген) сәйкес жүзеге асырады.

9. Аң аулау объектілеріне жатқызылған жануарлар түрлерінің санын есепке алу нәтижелері оңтайлы және нақты сандар көрсеткіштерінің арақатынасын ескере отырып, оларды алу лимиттері мен квоталарын анықтау үшін негіз болып табылады.

10. Аңшылық шаруашылығы ұйымдары жануарлар дүниесі объектілерінің өндірістік мониторингін жүзеге асырады, ол жануарлар дүниесінің биологиялық әртүрлілігін сақтау, оны орнықты пайдалануды қамтамасыз ету үшін болып жатқан өзгерістерді анықтау және бағалау, жағымсыз процестер мен құбылыстардың алдын алу және олардың зардаптарын жою мақсатында жануарлар дүниесі объектілерінің таралуын, санын, жай-күйін, таралымдарының құрылымын, мекендеу ортасының сапасы мен алаңын қадағалау жүйесін білдіреді.

3-тарау. Жануарлар дүниесінің объектілерін қорғау

Ескерту. 3-тараудың тақырыбы жаңа редакцияда – ҚР Премьер-Министрінің орынбасары – ҚР Ауыл шаруашылығы министрінің 02.11.2018 № 446 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

11. Бекітіліп берілген аңшылық алқаптарда жануарлар дүниесінің объектілерін қорғау:

1) жануарлар дүниесі объектілерін қорғау, өсімін молайту және пайдалану жөніндегі қағидаларды, нормалар мен нормативтерді белгілеу және сақтау;

2) жануарлар дүниесін пайдалануға шектеулер мен тыйым салуды белгілеу;

3) жануарлардың бағалы, сирек кездесетін және құрып кету қаупі төнген түрлерін қорғау;

4) жануарлар дүниесін пайдаланудың белгіленген қағидаларын бұзуды болдырмау;

5) жануарлар мекендейтін ортаны қорғауды, олардың көбею жағдайларын, өріс аудару жолдары мен шоғырлану орындарын ұйымдастыру;

6) жануарлар дүниесін пайдаланушыларға жануарлар дүниесі объектілерін қорғау жөніндегі міндеттерді жүктей отырып, аумақтарды, акваторияларды бекітіп беру;

7) ерекше қорғалатын табиғи аумақтарды құру;

8) жануарлар түрлерін жасанды түрде өсіру;

9) жануарлар ауырған жағдайда, дүлей зілзала кезінде және басқа себептер салдарынан қырылу қаупі төнген жағдайларда оларға көмек көрсету;

10) жануарлар дүниесін қорғау, өсімін молайту және пайдалану саласында ғылыми зерттеулерді ұйымдастыру;

11) жануарлар дүниесі объектілерін қорғау және орнықты пайдалану идеяларын насихаттау;

12) жеке және заңды тұлғалардың жануарлар дүниесін қорғау жөніндегі қызметін ынталандыру;

13) азаматтарды жануарлар дүниесіне жанашырлықпен және ұқыпты қарау рухында тәрбиелеу жолымен жүзеге асырылады.

Ескерту. 11-тармақ жаңа редакцияда – ҚР Премьер-Министрінің орынбасары – ҚР Ауыл шаруашылығы министрінің 02.11.2018 № 446 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

4-тарау. Аңшылық шаруашылықтарының қорықшылық қызметі

Ескерту. 4-тараудың тақырыбы жаңа редакцияда – ҚР Премьер-Министрінің орынбасары – ҚР Ауыл шаруашылығы министрінің 02.11.2018 № 446 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

12. Қорықшылық қызметтерді аңшылық шаруашылығы ұйымдары шартта және шаруашылық ішілік аңшылық ісін ұйымдастыруда көзделген санмен өз қаражаты есебінен құрады.

5-тарау. Бекітіп берілген аңшылық шаруашылықтарында жануарлар дүниесінің өсімін молайту

Ескерту. 5-тараудың тақырыбы жаңа редакцияда – ҚР Премьер-Министрінің орынбасары – ҚР Ауыл шаруашылығы министрінің 02.11.2018 № 446 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

13. Бекітіп берілген аңшылық шаруашылықтарында жануарлар дүниесінің өсімін молайтуды аңшылық шаруашылығы ұйымы жүзеге асырады және жануарлар дүниесі объектілерінің санын көбейту мен оңтайлы мөлшерін сақтауға және оларды орнықты пайдалануға бағытталған іс-шаралар кешенін қамтиды.

14. Бекітіп берілген аңшылық алқаптарда жануарлар дүниесінің өсімін молайту аңшылық алқаптардың өнімділігін арттыру мақсатында жүзеге асырылады және:

1) үстеп қоректендіру, азықтандыру кешендері мен азықтандыру алаңдарын құру;

2) жасанды су айдындары мен суаттар құру;

3) қорғаныштық өсімдіктер отырғызу, жасанды ұялар салу жолымен аңшылық алқаптардың ұя салуға жарамды алаңдарын ұлғайту;

4) жыртқыш жануарлардың санын реттеп отыру;

5) жануарлар дүниесін қорғау және өсімін молайту саласында ғылыми зерттеулер ұйымдастыру;

6) белгілі бір аумақта және белгілі бір мерзімге аңшылық шаруашылығы ұйымының шаруашылық қызметін шектеу;

7) жануарлар ауруларының алдын алу жөнінде іс-шаралар өткізу;

8) жануарларды қолда және жартылай ерікті жағдайларда өсіру;

9) жануарлар дүниесінің объектілерін жерсіндіру;

10) жыныс-жас құрамын реттеп отыру жолымен қол жеткізіледі.

15. Бекітіп берілген аңшылық шаруашылықтарында жануарлар дүниесінің өсімін молайту жөніндегі жұмыстардың тізбесі шаруашылық ішілік аңшылық ісін ұйымдастыруда көзделеді.

16. Бекітіп берілген аңшылық шаруашылықтарында жануарлар дүниесінің өсімін молайту жөніндегі іс-шараларды аңшылық шаруашылығы ұйымдары өз қаражаты есебінен жүргізеді.

6-тарау. Жануарлар дүниесін пайдалану

Ескерту. 6-тараудың тақырыбы жаңа редакцияда – ҚР Премьер-Министрінің орынбасары – ҚР Ауыл шаруашылығы министрінің 02.11.2018 № 446 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

17. Бекітіп берілген аңшылық шаруашылықтарында жануарлар дүниесін пайдалануды аңшылық шаруашылығы ұйымдары "Жануарлар дүниесін пайдалануға рұқсаттар беру қағидаларын бекіту туралы" Қазақстан Республикасы Ауыл шаруашылығы министрінің міндетін атқарушының 2014 жылғы 19 желтоқсандағы № 18-04/675 бұйрығына (Нормативтік құқықтық актілерді мемлекеттік тіркеу тізілімінде № 10168 тіркелген) сәйкес атқарушы орган беретін рұқсаттардың негізінде жүзеге асырады.

18. Аңшылық шаруашылығы субъектілері квота шеңберінде жануарлар дүниесі объектілерін алу құқығына жануарлар дүниесін пайдалануға рұқсат алған сәттен бастап, ал басқа жеке және заңды тұлғалар - аңшылық шаруашылығы субъектілерінен жолдама алғаннан немесе олармен аң аулауға шарт жасасқаннан кейін ие болады.

Аңшылық шаруашылығын
жүргізу қағидаларына қосымша

Аңшылық шаруашылықтарының санаттары

Аңшылық шаруашылықтарының санаттары	Аңшылық шаруашылығының алатын алаңының нормасы (гектар)	Аң аулау объектілеріне жатқызылған мекендейтін жануарлар түрлерінің шекті мөлшері	1 (бір) қорықшыға алаңды күзетілетін бекітіп беру нормасы (гектар)	Аңшылық алқаптарды бекітіп берудің ұсынылатын мерзімі (жыл)
1	2	3	4	5
1 санат	кемінде 5000	тұяқты жануарлар түрлері - кемінде 3, ұсақ және қанатты құстың түрлері - кемінде 5	1500-5000	49

2 санат	кемінде 15000	тұяқты жануарлар түрлері- кемінде 3, - ұсақ және қанатты құстың түрлері- кемінде 3	5000-10000	40
3 санат	кемінде 20000	тұяқты жануарлар түрлері-кемінде 2, ұсақ және қанатты құстың түрлері кемінде 3	10000-20000	30
4 санат	кемінде 20000	тұяқты жануарлар түрлері-кемінде 1, ұсақ және қанатты құстың түрлері-кемінде 3	20000-30000	20
5 санат	кемінде 10000	ұсақ және қанатты құстардың түрлері кемінде - 3	100 000	10